

ახალგაზრდა მეცნიერთათვის სტიპენდიის მოსაპოვებლად კონკურსის წესი

მუხლი 1. ზოგადი დებულებანი

- წინამდებარე წესი აწესრიგებს კონკურსში მონაწილე სუბიექტების მიერ ახალგაზრდა მეცნიერთათვის სტიპენდიის მოსაპოვებლად კონკურსის (შემდგომში - კონკურსი) ფარგლებში სტიპენდიის გაცემის, კონკურსის გამართვისა და საკონკურსო განაცხადის (შემდგომში - საკონკურსო განაცხადი) განხორციელების მონიტორინგის წესს.
- კონკურსის მიზანია მეცნიერების პოპულარიზაციისათვის ახალგაზრდა მეცნიერთა წახალისება, რომლებიც ეწევიან სამეცნიერო-კვლევით ან აკადემიურ საქმიანობას საქართველოს სამეცნიერო-კვლევით ან ავტორიზებულ უმაღლეს საგანმანათლებლო დაწესებულებაში.
- კონკურსი ფინანსდება საქართველოს სახელმწიფო ბიუჯეტიდან და მის ადმინისტრირებას ახორციელებს საჯარო სამართლის იურიდიული პირი - შოთა რუსთაველის საქართველოს ეროვნული სამეცნიერო ფონდი (შემდგომში - ფონდი). კონკურსის დაფინანსებისათვის შესაძლებელია, არსებობის შემთხვევაში, გამოყენებული იქნას დაფინანსების სხვა წყარო.

მუხლი 2. ტერმინთა განმარტება

ამ წესში გამოყენებულ ტერმინებს აქვს შემდეგი მნიშვნელობა:

- ფონდი** - საჯარო სამართლის იურიდიული პირი შოთა რუსთაველის საქართველოს ეროვნული სამეცნიერო ფონდი;
- გენერალური დირექტორი** - ფონდის გენერალური დირექტორი, რომლის ფუნქციებში შედის დასაფინანსებლად შერჩეული საკონკურსო განაცხადების დამტკიცება და, საჭიროების შემთხვევაში, საკონკურსო განაცხადებში ცვლილების შეტანის შესახებ გადაწყვეტილების მიღება;
- საკონკურსო განაცხადი** - დაფინანსების მოპოვების მიზნით, ამ წესით განსაზღვრული პირობების მიხედვით ფონდში წარდგენილი საკონკურსო განაცხადი;
- ახალგაზრდა მეცნიერი** - საქართველოს მოქალაქე, დოქტორის ან მასთან გათანაბრებული აკადემიური ხარისხის მქონე პირი, ახალგაზრდა მკვლევარი, რომლის აკადემიური ხარისხის მინიჭების დღიდან კონკურსის გამოცხადების დღემდე გასულია არაუმეტეს 7 წელი და რომელიც ეწევა სამეცნიერო-კვლევით ან აკადემიურ საქმიანობას საქართველოს სამეცნიერო-კვლევით ან ავტორიზებულ უმაღლეს საგანმანათლებლო დაწესებულებაში.
- შეფასების კრიტერიუმები** - ფონდში წარდგენილი საკონკურსო განაცხადების შესაფასებლად საკონკურსო კომისიისთვის განსაზღვრული, ამ წესით დამტკიცებული სახელმძღვანელო პრინციპები სათანადო ქულების მითითებით;
- დამოუკიდებელი ექსპერტი** - პირი, რომელიც საჭიროების შემთხვევაში აფასებს კონკურსის ფარგლებში წარდგენილ საკონკურსო განაცხადებს;

ზ) საკონკურსო კომისიები - კონკურსზე დარეგისტრირებული საკონკურსო განაცხადების შემფასებელი ორგანო, რომელიც განიხილავს და აფასებს კონკურსში შემოსულ საკონკურსო განაცხადებს, საკონკურსო განაცხადების შეფასების კრიტერიუმების შესაბამისად;

თ) სტიპენდია – ახალგაზრდა მეცნიერის მიერ კონკურსის შედეგად მოპოვებული ყოველთვიური ანაზღაურება.

ი) საანგარიშო პერიოდი – ხელშეკრულებით განსაზღვრული დროის მონაკვეთი, რომლის განმავლობაშიც ახალგაზრდა მეცნიერი ახორციელებს სასტიპენდიო ხარჯვას და დასრულების შემდგომ წარუდგენს ფონდს პროგრამულ ანგარიშს;

კ) სასტიპენდიო ანგარიში – ანგარიში მოიცავს სასტიპენდიო განაცხადის დასრულების შემდგომ, ახალგაზრდა მეცნიერის (სტიპენდიანტი) მხრიდან ფონდში წარმოდგენილ პროგრამულ ანგარიშს;

ლ) სასტიპენდიო ხელშეკრულების შესრულების მონიტორინგი – ხელშეკრულებით შესრულების დამადასტურებელი ანგარიშის შემოწმება.

მ) მიზნობრივი ანგარიში – საგრანტო ხელშეკრულებაში განსაზღვრული ახალგაზრდა მეცნიერის მიერ პროექტისათვის გახსნილი საბანკო ანგარიში, რომელზეც არ დაირიცხება სარგებელი და მოხდება ყოველთვიურად სტიპენდიის ჩარიცხვა;

ნ) ტრანში – სტიპენდიით განსაზღვრული ყოველთვიურად გადასარიცხი/გადარიცხული სახსრები;

მუხლი 3. სტიპენდიის კატეგორიები და კონკურსის პირობები

1. კონკურსში მონაწილეობის მიღების უფლება აქვს საქართველოს მოქალაქე ახალგაზრდა მეცნიერს, რომელიც ფლობს დოქტორის ან მასთან გათანაბრებულ აკადემიურ ხარისხს და ეწევა სამეცნიერო-კვლევით ან აკადემიურ საქმიანობას საქართველოს სამეცნიერო კვლევით ან ავტორიზებულ უმაღლეს საგანმანათლებლო დაწესებულებაში.
2. კონკურსში მონაწილეობის უფლება არ აქვს პირს, რომელსაც უკვე მოპოვებული აქვს ფონდის სტიპენდია.
3. კონკურსის ფარგლებში წარმოდგენილი საკონკურსო განაცხადი ითვალისწინებს სახელობითი სტიპენდიის კატეგორიებს შემდეგ სამეცნიერო მიმართულებებში:
 - ა) ნიკო კეცხოველის სახელობის სტიპენდია საბუნებისმეტყველო მეცნიერებების მიმართულებით;
 - ბ) ალექსანდრე ქართველიშვილის სახელობის სტიპენდია ინჟინერია და ტექნოლოგიების მიმართულებით;
 - გ) ივანე ბერიტაშვილის სახელობის სტიპენდია სამედიცინო და ჯანმრთელობის მეცნიერებების მიმართულებით;
 - დ) დავით სარაჯიშვილის სახელობის სტიპენდია აგრარული მეცნიერებების მიმართულებით;
 - ე) დიმიტრი უზნაძის სახელობის სტიპენდია სოციალური მეცნიერებების მიმართულებით;
 - ვ) ივანე ჯავახიშვილის სახელობის სტიპენდია ჰუმანიტარული მეცნიერებების მიმართულებით;
 - ზ) ექვთიმე თაყაიშვილის სახელობის სტიპენდია საქართველოს შესწავლელი მეცნიერებების მიმართულებით.
4. თითოეულ კატეგორიაში გამოვლინდება მხოლოდ ერთი გამარჯვებული.
5. სტიპენდია ახალგაზრდა მეცნიერს მიენიჭება კონკურსის გამოცხადებამდე ბოლო სამი წლის განმავლობაში მეცნიერებაში მიღწეული მიღწევებისათვის.
6. სასურველია კონკურსში მონაწილეობის მსურველ ახალგაზრდა მეცნიერს ჰქონდეს გამოქვეყნებული ორი სამეცნიერო ნაშრომი მაღალრეიტინგულ ჟურნალში ან ერთი მონოგრაფია.
7. კონკურსში გამარჯვებულად გამოვლენილი ახალგაზრდა მეცნიერი მიიღებს ყოველთვიურ სტიპენდიას 1250 ლარის ოდენობით ერთი წლის განმავლობაში და იღებს ვალდებულებას, ერთი

- წლის განმავლობაში ჩაატაროს 4 სამეცნიერო პოპულარული ლექცია საქართველოს ზოგადსაგანმანათლებლო საჯარო სკოლების (2 - თბილისის, 2 - რეგიონების) პედაგოგებისთვის.
8. კონკურსში გამარჯვებული ახალგაზრდა მეცნიერი ასევე ვალდებულია სტიპენდიის დასრულებისას, სამეცნიერო-კვლევითი მიღწევების შესახებ საპოსტერო მოხსენებით წარდგეს ფონდის მიერ ორგანიზებულ კონფერენციაზე.
 9. დადგენილი ვადის და ფორმის დარღვევით წარმოდგენილი საკონკურსო განაცხადები საკონკურსოდ არ განიხილება.
 10. ხელშეკრულებით გათვალისწინებულ სტიპენდიას, ყოველთვიური ტრანშების სახით, ფონდი რიცხავს ავანსად ახალგაზრდა მეცნიერის მიზნობრივ ანგარიშზე.

მუხლი 4. სასტიპენდიო კონკურსის ადმინისტრირება

1. სტიპენდიის მოპოვება შესაძლებელია მხოლოდ ღია კონკურსის წესით. კონკურსს აცხადებს და ადმინისტრირებას უწევს ფონდი ამ წესითა და ფონდის გენერალური დირექტორის ინდივიდუალური ადმინისტრაციულ-სამართლებრივი აქტით გათვალისწინებული პროცედურების მიხედვით.
2. ფონდი უზრუნველყოფს:
 - ა) საკონკურსო დოკუმენტაციის მიღების ვადების დადგენას; კონკურსის პროგრამისა და პირობების, საკონკურსო განაცხადის ფორმების, სასტიპენდიო დოკუმენტაციისა და სასტიპენდიო ანგარიშების შესრულების ფორმების შემუშავებასა და დამტკიცებას;
 - ბ) კონკურსის გამოცხადებას;
 - გ) კონკურსში რეგისტრირებული საკონკურსო განაცხადების ტექნიკურ ექსპერტიზას, რაც გულისხმობს წარმოდგენილი საკონკურსო განაცხადების დოკუმენტაციის შესაბამისობის დადგენას კონკურსის პირობებთან;
 - დ) საკონკურსო განაცხადების შეფასებისათვის აუცილებელი პროცედურების უზრუნველყოფას;
 - ე) საკონკურსო კომისიის მიერ შეფასების კრიტერიუმების შესაბამისად საკონკურსო განაცხადების განხილვას, რანჟირებული სიების დადგენას და გამარჯვებული საკონკურსო განაცხადების გამოვლენას;
 - ვ) გამარჯვებული კანდიდატების დამტკიცებას გენერალური დირექტორის მიერ;
 - ზ) კონკურსის შედეგების საჯარო გამოცხადებას.

მუხლი 5. კონკურსზე რეგისტრაციის წესი და წარსადგენი დოკუმენტაცია

1. ახალგაზრდა მეცნიერი ინდივიდუალურად რეგისტრირდება ფონდის გრანტების მართვის ერთიან სისტემა GMUS-ში [Grants Management Unified System და ქმნის „მეცნიერის პროფილს“;
2. კონკურსში რეგისტრაცია ხორციელდება შემდეგი ფორმით:
 - ა) ელექტრონული რეგისტრაცია – **2024 წლის 21 აგვისტოდან 13 სექტემბრის 18:00 საათამდე;**
 - ბ) ფონდის კანცელარიაში რეგისტრაცია - კონკურსში მონაწილეობის შესახებ ორიგინალი ხელმოწერით დამოწმებული განცხადების (იქმნება GMUS-ის საშუალებით, საკონკურსო განაცხადის დარეგისტრირების შემდეგ) მატერიალური ფორმით წარმოდგენა – **2024 წლის 18 სექტემბრის 18:00 საათამდე;**
3. კონკურსში მონაწილეობისათვის ახალგაზრდა მეცნიერი გრანტების მართვის ერთიან სისტემაში (<http://gmus.rustaveli.org.ge>) ელექტრონულად არეგისტრირებს საკონკურსო განაცხადს, რომელიც შედგება შემდეგი დოკუმენტებისგან:
 - ა) კრებსითი ინფორმაცია (დანართი N2, ივსება GMUS-ში პროექტის რეგისტრაციის დროს);
 - ბ) განმცხადებლის პროფესიული ბიოგრაფია - იქმნება გრანტების მართვის ერთიანი სისტემიდან (GMUS-იდან) ქართულ ენაზე (დანართი N3, იტვირთება GMUS - ში PDF დოკუმენტის ფორმით);

გ) ახალგაზრდა მეცნიერის სამოტივაციო წერილი, რომელშიც აღწერილია მისი სამეცნიერო-კვლევითი თემატიკის ღირებულება და მნიშვნელობა; აკადემიური კომპეტენციები; მეცნიერების პოპულარიზაციის მიმართულებით განხორციელებული აქტივობები; საზოგადოებრივი აქტივობები/მოხალისეობა, რომელიც ემსახურება დარგის განვითარებას (დანართი N4, იტვირთება GMUS - ში PDF დოკუმენტის ფორმით);

დ) ბოლო სამი წლის განმავლობაში (2021 წლის 20 აგვისტოდან - დღემდე) გამოქვეყნებული, გამორჩეული სამეცნიერო ნაშრომი/ნაშრომები (მინიმუმ ერთი) ინტერნეტ ბმულის მითითებით (დანართი N5, იტვირთება GMUS - ში PDF დოკუმენტის ფორმით);

ე) დამატებითი დოკუმენტაცია, როგორცაა სერტიფიკატი, ჯილდო, პრიზი და სხვა (იტვირთება GMUS - ში ერთიანი PDF დოკუმენტის ფორმით);

ვ) აკადემიური ხარისხის დამადასტურებელი დოკუმენტი (იტვირთება განმცხადებლის ინდივიდუალურ „მეცნიერის პროფილში“);

თუ აღნიშნული დოკუმენტი უცხოეთშია გაცემული, მას თან უნდა ერთვოდეს ნამდვილობის დამადასტურებელი დოკუმენტი ან სსიპ - განათლების ხარისხის განვითარების ეროვნული ცენტრის მიერ გაცემული დოკუმენტი უცხოეთში მიღებული განათლების აღიარების შესახებ;

ზ) ცნობა სამეცნიერო ან აკადემიური საქმიანობის შესახებ 2024 წლის მდგომარეობით, იტვირთება „მეცნიერის პროფილში“.

თ) განცხადება კონკურსში მონაწილეობის შესახებ (დანართი N6, იქმნება Gmus-ის საშუალებით).

4. საკონკურსოდ განიხილება მხოლოდ ის განაცხადი, რომელსაც, დადგენილი ვადებისა და წესების დაცვით, გავლილი აქვს ელექტრონული რეგისტრაცია და ფონდის კანცელარიაში მატერიალური ფორმით წარმოდგენილია „განცხადება კონკურსში მონაწილეობის შესახებ“. დადგენილი ვადების დარღვევით წარმოდგენილი განაცხადები საკონკურსოდ არ განიხილება.
5. ფონდი უფლებამოსილია, კონკურსის ნებისმიერ ეტაპზე კონკურსიდან მოხსნას საკონკურსო განაცხადი, რომელიც არ შეესაბამება კონკურსის მიზნებისათვის დადგენილ მოთხოვნებს ან შეიცავს ყალბ ინფორმაციას.

მუხლი 6. კონკურსის ეტაპები და საკონკურსო განაცხადების შეფასება

კონკურსის ადმინისტრირების ეტაპებია:

1. კონკურსის გამოცხადება დადგენილი წესით - 20 აგვისტო;
2. საკონკურსო განაცხადების ელექტრონული რეგისტრაცია - 21 აგვისტო - 13 სექტემბერი;
3. ჯგუფური ონლაინ კონსულტაცია - ზუსტი თარიღი და დრო გამოქვეყნდება ფონდის ვებგვერდზე;
4. ფონდის კანცელარიაში კონკურსში მონაწილეობის შესახებ განცხადების წარდგენა - 18 სექტემბერი;
5. კონკურსში რეგისტრირებული განცხადების ტექნიკური ექსპერტიზა - წარმოდგენილი განაცხადების დოკუმენტაციის შესაბამისობის დადგენა კონკურსის პირობებთან - სექტემბერი - ოქტომბერი;
6. შუალედური შედეგების გამოქვეყნება - ინფორმაცია კონკურსის პირობების დარღვევით წარმოდგენილი განაცხადების მოხსნის შესახებ - ოქტომბერი;
7. საკონკურსო კომისიის მიერ საკონკურსო განაცხადების შეფასება და გამარჯვებულების გამოვლენა - ოქტომბერი - ნოემბერი;
8. ფონდის გენერალური დირექტორის ინდივიდუალური ადმინისტრაციულ-სამართლებრივი აქტით გამარჯვებული განაცხადების დამტკიცება და კონკურსის შედეგების გამოქვეყნება - ოქტომბერი - ნოემბერი;
9. გამარჯვებულ ახალგაზრდა მეცნიერებთან ხელშეკრულებების გაფორმება - ნოემბერი.

მუხლი 7. საკონკურსო განაცხადების შეფასება

1. ფონდის გენერალური დირექტორი ინდივიდუალური ადმინისტრაციულ-სამართლებრივი აქტით ქმნის საკონკურსო კომისიას და განსაზღვრავს მის მუშაობის წესს;
2. საკონკურსო კომისია უფლებამოსილია, საჭიროების შემთხვევაში, მოიწვიოს დამატებითი დამოუკიდებელი ექსპერტი;
3. შეფასება ხორციელდება კომისიის მიერ ამ წესის მე-13 მუხლით განსაზღვრული შეფასების კრიტერიუმების გამოყენებით.
4. საკონკურსო კომისია განიხილავს და აფასებს კონკურსში შემოსულ საკონკურსო განაცხადებს შეფასების კრიტერიუმების შესაბამისად, ადგენს რანჟირებულ სიებს და ავლენს გამარჯვებულებს;
5. გენერალური დირექტორი ინდივიდუალური სამართლებრივი აქტით ამტკიცებს საკონკურსო კომისიის მიერ გამოვლენილ გამარჯვებულ საკონკურსო განაცხადებს.

მუხლი 8. ინტერესთა კონფლიქტი

1. დაუშვებელია საკონკურსო კომისიის წევრი იყოს ამავე კონკურსის მონაწილე.
2. არ შეიძლება საკონკურსო განაცხადების შეფასების და დამტკიცების პროცესში მონაწილეობდეს საკონკურსო კომისიის წევრი:
 - ა) რომელსაც აქვს საერთო პუბლიკაცია საკონკურსო განაცხადის წარმდგენთან ან მონაწილეობდა მასთან ერთსა და იმავე სამეცნიერო-კვლევით პროექტში, ან მუშაობს ერთსა და იმავე სტრუქტურულ ერთეულში (ფაკულტეტი, დეპარტამენტი);
3. ამ დებულების მიზნებისათვის ნათესავად ჩაითვლება:
 - ა) პირდაპირი ხაზის ნათესავი;
 - ბ) მეუღლე, მეუღლის და-ძმა და პირდაპირი ხაზის ნათესავი;
 - გ) აღმავალი ხაზის პირდაპირი ნათესავის და-ძმა;
 - დ) და-ძმა, მათი მეუღლეები და შვილები.
4. საკონკურსო კომისიის წევრი ვალდებულია გენერალურ დირექტორს ოფიციალურად აცნობოს ამ მუხლში აღნიშნული გარემოებებისა და თვითაცილების შესახებ.
5. იმ შემთხვევაში, თუ ინფორმაცია საკონკურსო წევრის ინტერესთა კონფლიქტის შესახებ ფონდისთვის ცნობილი გახდა დასაფინანსებლად შერჩეული საკონკურსო განაცხადების ფონდის მიერ დამტკიცებამდე, ფონდი უფლებამოსილია იმსჯელოს შესაბამისი საკონკურსო კომისიის წევრის მიერ გაკეთებული შეფასების გაუქმებასთან დაკავშირებით.

მუხლი 9. ხელშეკრულება

გამარჯვებულების დამტკიცების შემდეგ, ფონდი უზრუნველყოფს ახალგაზრდა მეცნიერთან ხელშეკრულებების გაფორმებას, რომელშიც დეტალურად გაიწერება ურთიერთვალდებულებათა პირობები.

მუხლი 10. შესრულების მონიტორინგი

1. დაფინანსებული ახალგაზრდა მეცნიერი ვალდებულია საანგარიშო პერიოდის ბოლოს ფონდის გენერალური დირექტორის მიერ დამტკიცებული ფორმების შესაბამისად, ფონდს წარუდგინოს პროგრამული აქტივობების ანგარიში.

2. ფონდი ახორციელებს დაფინანსებული საკონკურსო განაცხადების სასტიპენდიო ხელშეკრულების შესრულების მონიტორინგს, რომლის დროსაც განიხილავს სტიპენდიანტის მიერ წარმოდგენილ ანგარიშს და ადგენს შესაბამის განხილვის აქტს.
3. მონიტორინგი მოიცავს პროგრამულ მონიტორინგს.
პროგრამული მონიტორინგი გულისხმობს სასტიპენდიო ხელშეკრულებით გათვალისწინებული ვალდებულებების შესრულების დამადასტურებელი ანგარიშის შემოწმებას. ფონდი უფლებამოსილია პროგრამული მონიტორინგის ფარგლებში განახორციელოს ადგილზე ვიზიტები, სასტიპენდიო ხელშეკრულებით განსაზღვრული პროცედურების მიხედვით.
4. სტიპენდიანტის მიერ წარმოდგენილი ანგარიშების შემოწმების საფუძველზე მომზადებული განხილვის აქტები ფონდის მიერ შესაძლოა გამოყენებულ იქნეს სტიპენდიანტის მიერ მომავალ სასტიპენდიო კონკურსებში მონაწილეობისას წარდგენილი საკონკურსო განაცხადების შეფასებისას.
5. ანგარიშის განხილვისას საგრანტო პროექტით გათვალისწინებული ვალდებულებების შეუსრულებლობის შემთხვევაში გრანტის მიმღებს განესაზღვრება ხარვეზის გამოსწორების გონივრული ვადა.

მუხლი 11. სტიპენდიის შეჩერება, შეწყვეტა და დასრულება

ფონდი, საქართველოს კანონმდებლობის შესაბამისად, შეწყვეტს სტიპენდიის გაცემას, თუ ახალგაზრდა მეცნიერმა არ შეასრულა ხელშეკრულებით გათვალისწინებული ვალდებულებები ან/და ანგარიშში წარადგინა ყალბი ინფორმაცია.

მუხლი 12. დამატებითი მოთხოვნები ახალგაზრდა მეცნიერთა მიმართ

1. კონკურსში გამარჯვების შემთხვევაში, ახალგაზრდა მეცნიერმა (ერთი თვის ვადაში) უნდა წარმოადგინოს Power point-ში მომზადებული სამეცნიერო საჯარო ლექციების ვიზუალიზაცია, რომელიც შემდგომში განთავსდება ფონდის ვებგვერდზე და გავრცელდება სოციალური მედიის საშუალებით.
2. საჯარო ლექციების ფარგლებში შექმნილი ვიზუალური პროდუქცია (ფოტო, აუდიო, ვიდეო მასალები, პრეზენტაციები, ბუკლეტები, ფლაერები და ან სხვა ტიპის მასალები) განთავსდება ფონდის ოფიციალურ ვებგვერდზე, YouTube-ის არხზე და გავრცელდება სოციალური მედიის საშუალებით.

მუხლი 13. საკონკურსო განაცხადების შეფასების კრიტერიუმები

1. საკონკურსო განაცხადები შეფასდება შემდეგი კრიტერიუმების შესაბამისად:

	კრიტერიუმები	სუსტი	საშუალო	საუკეთესო	ჯამური შეფასება
1	სამეცნიერო პროდუქტიულობა სამეცნიერო ნაშრომები და კვლევითი საქმიანობის შედეგები (ბოლო სამი წლის განმავლობაში)	1-5	6-8	9-10	
2	ცნობადობა და აღიარება სამეცნიერო საზოგადოებაში ეროვნულ და საერთაშორისო სამეცნიერო ღონისძიებებში მონაწილეობა (სამეცნიერო კონფერენციები, სემინარები, ფორუმები)	1-5	6-8	9-10	

	სამეცნიერო ჯილდოები, პრიზები, სტიპენდიები და სხვა				
3	აკადემიური კომპეტენციები ახალგაზრდა თაობასთან მუშაობის და ცოდნის გაზიარების გამოცდილება აკადემიური და პროფესიული კარიერა	1-5	6-8	9-10	
4	საზოგადოებრივი აქტივობები მეცნიერების პოპულარიზაციის კუთხით განხორციელებული აქტივობები (საჯარო, სამეცნიერო-პოპულარული ლექციები, სამეცნიერო/შემეცნიებითი სატელევიზიო და რადიო გადაცემებში მონაწილეობა), ინტერდისციპლინური თანამშრომლობა და სხვა	1-5	6-8	9-10	
	შემაჯამებელი კომენტარი				

ა) შეფასების თითოეული კრიტერიუმი ფასდება 10-ქულიანი სისტემით და ჯამური მაქსიმალური შეფასება არის 40 ქულა.

ბ) თანაბარი ქულების დაგროვების შემთხვევაში, უპირატესობა მიენიჭება იმ საკონკურსო განაცხადს, რომელიც ჯამურად მაღალ ქულას დააგროვებს თანმიმდებრულად პირველ, შემდეგ მეორე, მესამე და მეოთხე კრიტერიუმებში.

შეფასება ქულით	შეფასება	განმარტება
1-5	სუსტი	საკონკურსო განაცხადი არაადეკვატურად ან ზოგადად პასუხობს მოცემულ ქვეკრიტერიუმს, გართულებულია შეფასება არასაკმარისი, ბუნდოვანი ან შეუსაბამო ინფორმაციის გამო.
6-8	საშუალო	საკონკურსო განაცხადი კარგად პასუხობს მოცემულ ქვეკრიტერიუმს, მაგრამ აქვს გარკვეული ხარვეზები და საჭიროებს გაუმჯობესებას.
9-10	საუკეთესო	საკონკურსო განაცხადი საუკეთესოდ პასუხობს მოცემულ ქვეკრიტერიუმს.